



Kurdistan In the Shadow of History¹

Necat KESKİN²

Received: Apr21, 2017 Reviewed: May12, 2018

Accepted: June02, 2018

Recommended citation:

Keskin,N. (2018). Kurdistan In the Shadow of History. *International Journal of Kurdish Studies*, 4 (2), 626–632. doi: [10.21600/ijoks.454583](https://doi.org/10.21600/ijoks.454583)

Bi piranî nirxandin û danasîna pirtûkê nû tê kirin lê di vê nirxandinê de em dê behsa pirtûkeke kevin bikin lewra ev pirtûk herçiqasî cara pêşî di 1997an de hatibe çapkiran jî îro hîna haya gelek kurdan jê tuneye û ji ber ku li derve hatiye çapkiran jî kurdên li Tirkîyeyê nikarin hêsanî bi dest bixin an jî bidestxistina wê hinekî zehmet e. Tenê di destê hinek kesan de heye û loma divê derbarê pirtûkê hinek agahî bi lêkolînerên sehayê û xwîneran re bêñ parvekirin. Ev xebata ku em behsa wê dikin pirtûka Susan Meiselas e ku bi navê *Kurdistan In the Shadow of History* (*Kurdistan di bin Siya Dîrokê de*) hatiye çapkiran. Çapa duyem ya pirtûkê di 2008an de hatiye kirin û ez bawerim derbarê dîroka nêzîk a kurdan yek ji xebatên girîng e û divê di pirtûkxaneya kesêñ ku li ser kurdolojiyê dixebeitin de cih bigire. Ji ber vê yekê jî li gorî min pêdiviyek bi nirxandin û danasîna pirtûkê heye. Ji aliyekî din ve jî pêdivî bi nirxandin û danasîneke weha heye lewra ev xebata wênekêşiyê bi wêneyêñ ku tê de cih digirin hafizeya sedsalî ya kurdan pêşberî me dike. Bi gotineke din wêne ligel nivîsêñ tê de dîroka kurdan a sedsalî û serboriyêñ wan, di serê me de zindî dikin.

¹Author:Susan Meiselas, Chicago & London, University of Chicago Press, XVII+402 + 549 (werger), 2008 (İspanya), çapa 2em.

²Asst. Prof., Dr., Mardin Artuklu University, Institute of Living Languages in Turkey, Kurdish Language and Culture Department, E-mail: necatkeskin@gmail.com

Wêne amûreke bîranîn û bibîranînê ye ji bo takekesan û di heman demê de bo civakan jî di avakirina hafizeya civakî de xwedî fonksiyoneke girîng e. Loma îcada kameraya wênekêşiyê ku di nîveka sedsala 19mîn de pêk hatiye di jiyana civakî ya mirovayetiyê de wek kêlikeke din e. Bi vê îcadê, êdî kêlikeke jiyanê di wê kêlîka ku çêbûye de dikare bê “cemidandin” ku piştî wê kêlîkê bi deh salan/sed salan jî mirov careke din dikare lê binêre û binirxîne. Ji bo rûdanêن civakî jî wêne heman fonksyonê tîne cih. Loma iro wêne dikarin wek belgeyên dîrokî jî bêñ dîtin ku mirov dikare bi saya wêneyan-bêguman ligel ravekirin û çavkaniyêñ din- derbarê jiyana doh de bibe xwedî agahî. Bi gotineke din wêne dîrokê dîtbar dike. Gelek caran rûdanêن dîrokî ku li ser kaxezan *cemidîne* bi rêya wêneyan ji wê *sarbûna* xwe dûr dikevin û bireng û ruh dibin. Kesêñ li *wir* bi rêya wêneyan careke din wek ku hîna li *vir* in û li hemberî me ne li me dinêrin, tiştekî ji me re dibêjin, bi me re dipeyivin. Loma ji bo hafizeya takekesî û avakirina hafizeya civakî an jî kolektîf wêne amûreke gelekî girîng e. Herçiqasî ev îcad di serdemâ *modern* de derketibe meydanê jî bi modernîzmê re di nav nakokiyekê de ye.

Derbarê mijarê, di pirtûka xwe ya bi navê *Modernite Nasıl Unutturur* de Paul Connerton dibêje ku modernîzmêlezgîniyek derxistiye meydanê û di nav vê lezgîniyêde jî hafize têk diçe, tê jibîrkirin. Di vê çarçoveyê de Connerton îcada rêya hesin wek sembola lezgîniya modernîzmê dinirxîne lê ligel vê lezgînî û pêvajoya têkbirina hafizeyê tiştekî din jî di wê demê de derketiye ku hevsengiyek bi vê lezgîniyê re çêkiriye ku ev jî îcada kamera û wênekêşiyê ye. Li gorî Connerton ev hevsengiyeke çandî ye û ligel ku rêya hesin lêzgîniyê hildiberîne, wênekêşî bêheretiyê hildiberîne; ligel ku rêya hesin pêvajoyen bibîranînê dihejîne, li hev dixe, wênekêşî tebeqeyeke din li pêvajoyen bibîranînê zêde dike. Di vê nirxandinê de wêne şahidêñ dîrokê ne û ji ber vê yekê jî wêne û wênekêşî li hember jibîrkeriya modernîzmê wek berxwedanekê ye.

Di vê çarçoveyê de xebatêñ wênekêşiyê yên ku wek *wênekêşîya dokumenterî* têñ binavkirin ji bo avakirina hafizeya kolektîf û bibîranîna paşerojê gelekî girîng in. Xebatêñ wênekêşîamerîkî Susan Meiselas jî dikarin di vê çarçoveyê de bêñ nirxandin. Susan Meiselas endama *Magnum* ye ku ajanseke navdar a cîhanî ya wênekêşiyê ye (Magnum Photo Agency) û wek endama vê ajansê xebatêñ balkêş ên wênekêşîya dokûmenterî kirine. Gelek salan li Amerikaya Latîn xebitiye. Nikaragua, Şîlî, El Salvador, sînorê Meksîka û Amerîka hînek cih in ku Meiselas li *wir* xebatêñ wênekêşiyê kirine. Xebateke wê ya navdar û balkêş jî derbarê kurdan e û bi navê *Kurdistan In the Shadow of History* hatiye çapkîrin. Ev xebat ji bo kurdan xebateke “efsanewî” ye. Efsanewî ye ji ber ku em dizanin heye lê bidestxistina wê gelekî zehmet e. Wek gelek kurdan min jî ev pirtûka Meiselas gelekî meraq dikir û min dixwest ku vê pirtûkê bikirim, lê binêrim. Di 2013an de gava Susan Meiselas di çarçoveya *Rojén Weneyan* de hat Diyarbekirê û li *wir* behsa jiyana xwe ya wênekêşiyê û xebata xwe ya bi navê *Kurdistan* kir û weneyêñ ji xebata xwe pêşkêş kirin wekî hemû guhdarvanêñ li *wir* meraqa min jî hîn zêdetir bû û min xwest di demeke kurt de vê pirtûkê bi dest bixim. Lê çawa? Pirtûk li Amerikayê bû û beha bû. Ligel vê divê kesek hebûya ku ji *wir* bi xwe re bîne. Ev derfet ancax piştî çend salan ket deste min gava yekî amerîkî bû xwendekarê me yê besa Kurdî. Camer xwestekame nekir du û ji me re ji *wir* anî. Gava ku pirtûk nû ket destê min wek zarokekî ku berî eydê cilê nû jê re hatibin kirin kêfa min hat. Min pirtûk danî ser maseya xwe ji bo herkes bibîne û yêñ ku didîtin jî gelekî diecibandin û kêfxweşîya xwe dianîn ziman. Min

dît ku pirtûk cara pêşî di 1997an de hatiye çapkîrin û ya ku di destê min de bû jî çapa duyem ya 2008an bû. Ya ku em li ser diaxivin û danasîna wê dîkin jî ev çapa duyem e ku di 2008an de hatiye kirin.

Pirtûk bi 4 wêneyên ji Herêma Kurdistanê dest pê dike ku yê pêşî dîmeneke ji çiyayên Herêma Kurdistanêye (Northern Iraq) û yê duyem koça kurdên Iraqê ya 1991ê ye; di yê sêyem de em Qeladiza xerabe dibînin ku di 1989an de di operasyona Enfalê de hatiye ruxandin; di yê çarem de jî goristana qurbaniyên êrîşa kimyewî ya 1988an heye. Yanî bi her çar wêneyên di serî de em serborî û trajediya kurdan ya vê serdema nêzîk *dibînin*.

Têkiliya Susan Meiselas bi kurdan û serboriya kurdan re jî jixwe di 1991ê de dest pê dike gava kurd bi tevahî ketin rojeva dinyayê de. Di pirtûkê de, vê destpêka naskirin û lihevraştatina xwe ya bi kurdan re weha dibêje;

Gava Şerê Kendavê dest pê kir, wekî gelek amerîkiyan min jî derheqê kurdan de kêm tişt dizanîbû. Ziyareta min ya pêşî kurt bû. Ez kêfxwêş bûm ku rojnamevanên rojavayî şahidiya pêdiviya demildest ya alîkariya insanî ya kurdan dikirin. Îranê vîzeya pênc rojan û destûra ziyareta kampên pênamberên kurd da min. Ji bo derketina ji Parîsê, derbasbûna sînorê Îranê û çûyîna herêma “rizgarkirî”ya di nav Bakûrê Iraqê de hindik wext hebû. Dema ku bala dinayayê li ser koçkirina kurdan bû, tiştekî ez ber bi cihêن ku ew jê dihatin ve dikişandim. Ez ber bi rêya ku kurd hîna jî jê dihatin ve çûm. Ez bi dîtina rewşê matmayî bûm. Ez tu carî bi wî awayî nebûbûm şahidê xerabkirina jîyana gundewarî ligel deh salêن di nav şerên navxweyî yê Amerîkaya Navendî de jî.

Meiselas bi vî awayî kurdan û trajediya wan nas dike û heta 1997an jî dem bi dem diçe Herêmê û li wir wêneyan dikişîne. Ew di heman demê de di çarçoveya projeyeke mafêñ mirovan de derbarê Enfalê jî wêneyên cihêñ gorêñ girseyî dikişîne. Yanî bi wêneyên xwe dibe şahidê trajediya kurdan ya operasyona Enfala 1988an û wêneyên wê piştî bi salan jî dibin şahidê wê demê. Bi demê re Meiselas dikeve pey şopa wêneyên *kevin* ku li “Kurdistan”ê hatine kişandin, lê *li derive ne* ku di encamê de vê pirtûka di destê me de pêk tînin.

Pirtûka Susan Meiselas ji bilî *destpêk* û *wergeran*, ji şes besêñ sereke pêk tê. Hemû bes bi pêşkêsiyeke Martin Van Bruinessen dest pê dîkin. Dîsa hemû bes ligel wêneyan hatine pêşkêşkirin ku ew wêne di wê demê de hatine kişandin û di arşîv û muzeyan de hatine parastin. Loma mirov di pirtûkê de, ne tenê dîroka kurdan ya 150 salî dixwîne lê vê dîrokê dibîne jî. Ji ber ku mijar di nav dîrokê de kurd in an jî wek sernavê pirtûkê “kurdên di bin siya dîrokê” de ne, ligel ku xebat ya Meiselas e wêneyên ku di xebatê de cih digirin hemû ne yên Susan Meiselas bixwe ne. Heta dikare bê gotin ku di pirtûkê de wêneyên herî kêm yên Meiselas in. Ev yek di tevahîya pirtûkê de tê dîtin.

Eger em bêñ ser besêñ pirtûkê; di *destpêk* de Meiselas wê serboriya xwe ya naskirina kurdan, ketina pey şopa wêneyan û herweha zehmetiyêñ derbarê bidestxistina wêneyan vedibêje. Di salêñ 1992an de jineke biyanî di nav Tirkîyeyê re derbasî “Iraq”ê dibe û li wêneyan digere. Ew ne tenê li wêneyan digere, lê li kesêñ di wêneyên arşîvên Rojavayıyande jî digere li gel alîkar û rîberên xwe. Di 1993an de êdî hew dikare biçe Herêmê lewra Tirkîye

derî digire û çûnûhatina kesên ne girêdayî sazîyan bisînor dike. Êdî jê û pê ve Meiselas di arşîvan de li wêne û belgeyêner derbarê kurdan digere.

Beşa yekem *Berî Şerê Mezin* (*Before The Great War*) e ku agahiyêner derbarê kurdan ên berî Şerê Cihanê yê Yekem dide ûberê xwe dide nivîs, xebat û wêneyêner lêkolîner, wênekêş, mîsyoner û gerokan ku Ernest Chantre, Antoin Sevruguîn, Emma Barnum, Isabelle L. Bird, Mark Sykes û Gertrude Bell tenê hinek ji wan in. Hem nivîsên wan û hem jî wêneyêner ku kişandine di vê beşê de cih digirin.

Beşa duyem *Ji Împeratoriyan ber bi Netew-dewletan ve* (*From Empires to Nation-States*) ye. Di vê beşe de êdî bêhtir nêrîn, nivîs û wêneyêner peywirdarêñ leşkeri yên dewletêñ Rojavayî hene. Dinya di nav guherînekê de ye û kurd jî dixwazin di nav vê guherînê de cihê xwe bigirin. Serheng (Colonel) Noel, James G. Harbord, E. W. C. Noel hinek ji van peywirdaran e ku Meiselas cih daye nivîs, nêrîn û herweha wêneyêner wan. Di vê beşê de serboria kurdêñ Iraq û Tirkîyeyê bi wêneyan û ligel nivîsan hatiye pêşkêşkirin.

Di beşa sêyem de ku bi navê *Komara Kurd a Mehabadê* (*The Kurdish Republic of Mahabad*) e, serboria Komara Mehabad nîşanî me dike ku di 1946an de li Mehabadê hatibû avakirin û di dawiya heman salê de hatibû ruxandin. Di vê beşê de dîsa wêneyêner demê, nêrînê peywirdarêñ biyanî û her weha hevpeyvîneke Qazî Muhammed jî cih digire û beş bi wêneyêner daliqandina Qazî Muhammed diqede.

Sernavê beşa çarem *Bihevrejiyana Nerehet* (*Uneasy Coexistence*) e ku serboria kurdan ya piştî Şerê Cihanê yê Duyem heta dawiya salêñ 1990î pêşkêşî me dike. Tevgera kurdan ya Piştî Şerê Cihanê, rîwîtiya Mela Mustafa Barzanî ber bi Yekitiya Sowyetê, çalakiyêñ li Tirkîyeyê di vê beşe de ligel wêneyan cih digirin.

Beşa pêncem bala xwe dide salêñ 1960î ku kurd careke din ji bo bidestxistina mafê xwe dikevin nav tevgerê de. Loma sernavê beşê jî *Şerê Çekdarî ji bo Xweseriyê* (*Armed Struggle for Autonomy*) ye. Vegera Mele Mustafa Barzanî ji Yekitiya Sowyetê, çalakiyêñ çekdarî, jiyana gundewarî ya Kurdistana Iraqê ligel wêneyan cih digire di vê beşê de. Herweha rûdanêñ siyasî, civakî yên li Tirkîyeyê û Iranê jî di vê beşê de ne. Şoreşa İslâmî ya Iranê, darbeya leşkerî ya Tirkîyeyê ya 12ê Ilona 1980yî û bandora wan li ser kurdan ligel wêneyan hatine pêşkêşkirin.

Mijarêñ beşa şeşem êdî rûdanêñ piştî salêñ 1990î ne ku serdemâ *Piştî Şerê Sar* (*After the Cold War*) e. Şerê Sar (Cold War) qediyyaye, Şerê Kendavê dest pê kiriye û kurdêñ Iraqê piştî tevgera bi salan derfeta aramîyê bi dest xistine. Beş bi wêneyekî dest pê dike ku naveroka beşê sembolîze dike. Ev wêneyê wêneyekî Sedam Huseyin e ku li ser dîwar e û piştî şoreşê bi guleyan hatiye xerakirin. Ji vî alî ve rizgarbûna kurdêñ Iraqê ji bin desthilatdariya Sedam Huseyin jî nîşan dike.

Herweha cih dide rûdanêñ berî 1990î jî yên wek Helebçe û Enfalê. Wek ku di serî de jî hatibû gotin di vê demê de kurd dikevin rojeva dinyayê û di kovarêñ navdar yên wekî Time de kurd dibin mijar. Herweha Meiselas di vê beşê de gelek nêrîn û weneyêner wênekêş û rojnamegerêñ biyanî ligel ên xwe pêşkêşî me dike. Ji aliyê din ve rûdanêñ li Tirkîyeyê, belavbûna pêvçûna çekdarî jî di nav mijarêñ vê beşê de ne. Wek ku di serî de hat gotin pirtûk cara pêşî di 1997an de tê çapkirin. Loma heta çapa duyem ya 2008an gelek guherîn çêbûne li

herêmê.Ji ber vê, di vê çapê de rûdanên piştî 1997an jî wek binbeşeke piçûk bi navê Not, Piştî Deh Salan (Postscript, Ten Years Later) cih digirin. Girtina Abdullah Öcalan û çalakiyên girseyî yên kurdên Tirkiyeyê; serkeftina partiya HADEPê di hilbijartinê herêmî de; ji aliyê din ve midaxeleya Amerîka li Iraqê û ezilkirina Sedam Huseyin û avabûna Herêma Kurdistanê jî wek mijarêne vê dawiyê ne ku Meiselas di vê çapê de cih daye wan.

Pirtûk bi biyografiyên kesên navdar û yên ku di pirtûkê de cih digirin, ferhengeke kurt, çavkanî, pêşniyara çavkaniyên bo xwendinê û îndeksê diqede. Wergerên tirkî û soranî yên nivîsên di pirtûkê de jî di dawiya pirtûkê de cih digirin.

Bi vî awayî xebata Susan Meiseleas jiyan, tevger û serboriya kurdan a sedsalî bi wêneyan û ligel nivîsên ji çavkaniyên yekem pêşkêşî me dike û nîşanî me dide. Loma herçiqasî pirtûk ji aliyê wênekêşekê ve hatibe amadekirin jî û wêne di pirtûkê de cihekî sereke bigirin jî, xebat ne tenê ji wêneyan pêk tê. Wekî li jor jî hat gotin her beşek bi pêşkêşiyekê Kurdologê Hollandî Martîn Van Bruinessen dest pê dike. Herweha nivîsên wê demê û bi taybetî jî wêneyên wê demê aliyê herî xurt ê xebatê ye. Ew wêne ne ku wek dokûmentekê li hember jêbirinê disekekinin.

Wêneyên herî kevin ku di pirtûkê de cih digirin digihîjin salên 1890î ku bi giranî ji arşîvên gerok û mîsyoneran hatine wergirtin. Di heman demê de em rastî hinek xebatê zanistî jî dibin ku Meiselas cih daye wan. Xebata antropologê frensî Ernest Chantre ya bi navê *Les Kurdes* yek ji van xebatan e ku ligel wêneyên wênekêşê frensî Captain Barry di 1897an de hatiye çapkiran. Ev yek jî qedrê vê xebatê zêdetir dike.

Ji aliyê din ve xuyaye ku Meiselas ji bo vê xebatê di arşîvan de lêkolîn û lêgerîneke geleki berfireh kiriy. Ne tenê wêne û wêneyên xwe peşkeş kirine, lê di heman demê de ji nivîsên lêkolîner, mîsyoner, peywirdarêň leşkerî û gerokan; ji nivîsênrojnameyan û herweha ji wêneyên wênekêşan jî sûd wergirtiye û cih daye wan. Loma ev herçiqasî xebateke wênekêşekê be û wek xebateke wênekêşiyê be jî, di heman demê de dikare bê gotin ku xebateke etnografyayê ye; xebateke derbarê hafizeya kolektif ya kurdan e jî. Wek ku Meiselas dibêje; *ev pirtûk, li ser bermayıyên ku ji nû ve hatine bidesxistin, jinûveavakirinek e.*

Di destpêkê de Meiselas derbarê pirtûkê de hevîya xwe weha ifade dike; *Ji bo kurdan, ez hêvî dikim ku ev pirtûk wek pirtûkeke çavkanî ya dîroka binpêkirî ku niha ji nû ve dikare bê bidesxistin, xizmetê bike.* Ez bawerim ev pirtûk di vî warî de xizmeteke bi vî rengî dide û dê bide kurdan û herweha wan kesan ku derbarê dîrok, jiyan û çanda kurdan lêkolînan dikin. Ji ber vê yekê jî wek ku me di serî de got; ev pirtûk divê di pirtûkxaneya her kurdologekî de cih bigire.

Ji bo agahiyê din derbarê Susan Meiselas û xebatên wê dikare ji malpera wê sûd bê wergirtin (<http://www.susanmeiselas.com/>); ji bo projeya wê ya li ser kurdan û hinek wêneyên din ên derbarê kurdan jî (http://www.susanmeiselas.com/archive_projects/kurdistan/#id=transformation).